


NA LUKWIKILU, MOISE

 Matondo, Mpangi Neville. Mbote, bampangi ya munu. Yawu ke kiese bubu yayi na kuvwanda awa na tabernacle. Mpe mu banzaka ti kana Mpangi Neville lunga longa na suka yayi, mu lungaka longa na nkokila yayi. Mpe mu vwandaka banza na dilongi ya lukolo ya Lumingu ya suka yayi. Mpe yinki. . . Kana Mfumu zola, beto ke meka na—na kuvwanda na dilongi ya lukolo ya Lumingu.

² Ntangu yayi, yawu me lungisa basabala zole ntangu yayi, mu banza, kubanda mu me vutuka. Mpe mu vwandaka na kidi-kidi mutindu beno lunga bakula yawu, kuna, na kisika ya malongi, mu vwandaka ya kulemba mingi, ya kulemba mingi mpe na mpasi mu lungaka fula na kulonga. Mpe ya lombaka ti mu kwisa pema fioti. Mpe mu lutisaka bilumbu tatu na Wolf Creek Dam, kuna na Kentucky, sika wapi mu butukaka. Mu banzaka, “Oh, mu ke mbote ntangu yayi. Mu ke mbote.”

³ Mpe na ntangu mu vutukaka na yinzo, mpe mwa diambu ya ntete mu kutanaka na yawu vwandaka diambu ya mpaku. Mu lembaka diaka mingi. Na yawu mu bakulaka ti ya ke lomba sabala mosi to zole samu mu baka kikesa.

⁴ Diaka ministere ya munu zola baka nsobolo mosi ntangu yayi. Mpe mu ke na manaka ya balukutakanu ve. Mpe kikuma yawu yina mu vwandaka fioti na kingenga, mpe mu banzaka, mpe ntangu yayi samu na basabala yina ke kwisa, mu ke pema, kupema ya kieleka, mpe mu ke tala kaka na Mfumu.

⁵ Mpe mingi kati ya beno kele awa, bayina ke basoda ya nkulu, bayina ke vwandaka na beto ntangu ya yinda, beno ke bambuka moyo ti yina Mfumu tubaka na beto, Yandi ke lungisa yawu na ntangu yina Yandi tubaka ti Yandi ke sala yawu.

⁶ Beno bambuka moyo, na mbatukulu, na yinzo-Nzambi awa, na suka yina beto tulaka ditadi ya ntete ya tabernacle, mutindu Yandi. . . Mu sonikaka yawu, mpe tulaka yawu na ditadi yina, na dititi ya mbatukulu ya Biblia ya munu. Na suka yina, vision yina ya nene, tubaka, “Yayi ke tabernacle ya nge ve.”

⁷ Mu tubaka, “Ya ke wapi, Mfumu?” Yandi nataka munu kuna na zulu ya matuti. Mpe Ndinga mosi wakanaka. Mpe mu talaka mpe monaka kima mosi mutindu bakulansi tatu, kuna, bayinti mpe bambuma na yawu, mpe nionso yina. Beno zaba vision yina. Yawu sonamaka kuna, bamvula mingi me luta.

⁸ Kilumbu mosi, mu bakaka, buku mosi ya nkulu kuna, mu vwandaka tanga mambu yina Mfumu zabisaka, zabisaka na ntwala; nionso yina me salamaka. Na yina me tadila bangunza,

mpe mutindu mvita ke kwisa, mpe mambu yina nionso me salama.

⁹ Mambu zole kaka me bikala, kati na mosi ya ba profesi yina ya nene. Yantete, ke vwanda na bamatoma yina ke twadisama na masini, na mutindu ya diki, beno lunga pusa yawu ve. Yawu ke kukitwadisa yawu mosi. Mpe kento mosi ya ngolo mingi ke basika, samu Amerique ke yinsi ya bakento. Mpe ya ke vwanda . . . Kento mosi ya ngolo mingi ke basika, mpe ke vwanda Ntwadisi to kima ya mutindu yina, na yinsi yayi. Mpe kuna ke kwisa kubeba ya muvimba. Yinsi ya muvimba ke vwanda na mbombi.

¹⁰ Mpe, yayi, mu ke zabisa kaka na ntwala. . . Beno zaba ti ya ke Mfumu ve me tuba yawu. (Kima yankaka, na yina me tadila kento, yawu kele, Mfumu.) Kasi mu zabisaka na ntwala, na 1933, ti yinza ke vwanda na kubeba ya ngolo na ntwala ya mvula '77.

¹¹ Na yawu, mu zabaka ve ti bawu ke vwanda na kima yina lunga bebisa yawu mutindu bawu ke na yawu ntangu yayi, kasi mu monaka yinsi na kati ya kubeba ya ngolo, yawu bikalaka kaka na bansimbulu ya bayinti mpe mambu ya mutindu yina, bikalaka.

¹² Mpamba ve, yawu ke kwisa. Mpe kana mambu yayi kusalama kaka mutindu Yandi tubaka, ya ke salama mutindu mosi, mutindu Yandi tubaka awa na Masonuku, Yandi ke tuba mutindu yina, kana Klisto kwisaka na mbala ya ntete, Yandi ke kwisa na mbala ya zole. Mpe mambu yina nionso Yandi tubaka ke salama. Mpe mutindu ya ke monika mbote-mbote, mpe na kuzabaka ti beto kele. . . ngunga ya bawu ke bula, mutindu yinsi mosi, na kuzabaka ti Dibuundu ke kwenda ntama mingi ve na Enlevement ya Yandi. Yawu ke sepelisa ntima ya longi mosi, to konso mukwikidi yina, na kuzabaka ti beto ke zinga na kilumbu yayi mpe ntangu yayi beto ke zinga. Yawu ke ntangu mosi ya nkembo yina muntu mosi ve me zingaka ntete na zulu ya ntoto, ke ntangu yayi; kisongidila, samu na Dibuundu. Na yawu, ya kieleka mu ke na nsatu ya bisambu ya beno.

¹³ Mu monaka diaka ti na tabernacle, mpe mu monaka ti bawu ke vwanda. . . bawu ke vwanda na nsodolo yankaka mpe nionso yina, na yinzo-Nzambi, samu na mwa bantu ya conseil mpe nionso yina.

¹⁴ Mpe—mpe yinzo-Nzambi ke na nsatu ya mwa lukutakanu mosi, mwa nsobolo ya bisika. Mpe beno ke vwandaka na lutondo ya munu ntangu nionso, mpe beno zaba mutindu ya kusakumuna munu. Kuvwanda ya munu awa, ke monana lusakumunu samu na beno. Mu ke ndima yawu, kuvwanda kati na beno, kele yinto ya lusakumunu samu na munu. Mpe beno ke ndimaka ntangu nionso ti yina mu ke tubaka na beno ke Kieleka, mambu yina Nzambi monisaka na munu. Mpe mu—mu ke sepela na yina.

¹⁵ Mpamba ve, mu banzaka, mpe mu bakulaka ti, mu lendaka sungika yinzo-Nzambi ya beto, na ba conseil ya yawu, mpe samu na kusoola mpe mambu ya mutindu yina. Mpe na yawu—na yawu, mu banzaka ti, na manima ya yina, mu ke kwenda pema fioti na ntwala mu vutuka diaka na kisika ya malongi.

¹⁶ Beno bumba yawu samu na beno mosi. Ntangu yayi, yawu ke samu na bantu ya nganda ve. Yawu ke samu na tabernacle yayi. Beto zola vwanda na lukutakanu ya tabernacle yayi, na mutindu ti mambu nionso, mpe bifu nionso, mambu nionso ya ntama, mpe mbala yankaka mwa bansatu nionso yina ke kati na mosi na yankaka; bantu yina nionso, mu ke vukisa bawu kisika mosi. Na yawu kana beno zola kutana na yawu ve, kulutila mbote beno basika na yinsi; samu beno ke kutana na yawu kaka tii na nsuka, mutindu beto vwandaka na kikalulu ya kusala yawu awa na tabernacle. Mpe beto ke sungika nionso mbote-mbote, samu beto ke bampangi-bakala mpe bampangi-kento yina me kabisa mbundana, Nzutu ya Klisto, pene-pene ya mesa ya masakumunu. Mpe ke kaka diabulu yina ke kotisa kifu, mpe ke nata bansatu, to nkabisa, to kima ya mutindu yina. Mpe mu ke baka Mpangi ya beto Neville, mpe beto ke kwenda kisika mosi na mosi, samu na kuvukisa bantu yina, kisika mosi, tii kuna tabernacle yina ya nkulu ke vutuka, diaka, ke telema mbote-mbote, mpe ke kwenda na ntwala samu na Kimfumu ya Nzambi. Ntangu yayi, yayi ke, kikuma mu me tuba yawu, kele samu na mwa kimvuka ya beto yayi me vukana awa na suka yayi.

¹⁷ Na yawu mu ke pema fioti, mpe mu ke vutuka na nswalu nionso. Na nionso mu zola kwenda diaka na kisika ya malongi. Mpe na mbala yayi, kana Mfumu zola, mu zola sadila mwa mbongo ya beto mosi, yina zola tuba, ya munu mosi, yina ke kuna na . . . manaka yayi ya kulonga na bayinsi ya nzenza. Mpe mu kuzwa tenta ya malu-malu, mpe bisadulu ya malu-malu, mpe kubanda na sika ya kulonga. Yawu ke kukota na yinzo-Nzambi mosi na yinzo-Nzambi yankaka ve, kasi kusala balukutakanu ya beto mosi.

¹⁸ Ntangu yayi, samu na kumona mpamba ve bampangi yina bokilaka munu, yina ke diambu ya kulutila kitoko. Kasi na nionso, beno ke mona ti na balukutakanu yayi ya balongi, bawu ke zabisa na ntwala kukwisa na beno, mpe na yawu bankundi ya beno nionso ke kwisa kuna, mpe na yawu ke vwanda na makelele mingi samu na kubaka mbongo ya bawu. Ya ke lembisa mingi bantu yina. Mu ke bakula yawu mutindu yina, beno me mona. Yina ke—yina ke mbote ve. Beto zola vwanda na kisika mosi beto lunga vukisa bawu. Beno fwana nata mbongo ya beno ve. Beno kwisa kaka, beno mosi, mpe—mpe sadila Mfumu. Beno me mona? Mpe na ntangu yayi . . .

¹⁹ Mpe ministere ya munu me baka nsobolo mosi na ntangu yayi. Beno bambuka moyo na ntangu mu lungaka simba diboko ya muntu mosi, kutelema kuna, mpe tii kuna Mfumu ke tuba

na munu yina vwandaka diambu ya yandi. Yandi tubaka, “Ke vwanda na ntangu mosi ti, nge ke zaba binsweki ya bantima ya bantu.” Beno nionso zaba mbote ti yina salamaka mbote-mbote mutindu Yandi tubaka. Yayi ke etape yankaka, yina pesamaka na profesi mpe tubamaka na ntuala, yina ke vwanda na zulu na Yawu, beno me mona. Nsobolo ke salama na ntangu yayi.

²⁰ Kikuma yawu yina Satana ke nwanisa munu na nzila ya diambu yayi ya mpaku, na kutubaka na munu ti, luyalu, mu fwana futa mpaku ya konso dikuta mu bakaka, mutindu longi, kubanda bamvula makumi zole na sambwadi, kubanda ministere ya munu. Yawu ke mutindu yina ve, samu yawu pesamaka na yinzo-Nzambi awa.

²¹ Mu ke administrateur ya yinzo-Nzambi yayi. Yina ke kieleka. Yawu ke na mikanda awa. Mpamba ve, na yawu, mu ke administrateur mpe tresorier ya yinzo-Nzambi yayi, na yawu yinza ke na kima mosi ve. . . Luyalu lenda kota diambu yina ve. Bawu ke yufula kiuvu na yinzo-Nzambi ve. Bawu ke yufula kiuvu na munu yina ke tresorier ya yinzo-Nzambi. Mpe ba administrateur tulaka kinieminu ya bawu kuna na banke ti, yina ke mbongo ya munu. . . Na sika kuvwanda na kimvuka ya munu mosi, mu pesaka yawu na yinzo-Nzambi ya munu awa, samu yawu ke kimvuka mosi, na mutindu nionso.

²² Mpe yawu yina, ke sala ti mu yambula yinzo-Nzambi mpe mu bika yawu, mpe mu kwenda mpe mu vwanda kima mosi ve awa. Na kutala ti mu silaka na bantu ti mu lunga vutukisa na yinzo-Nzambi, na ntangu nionso, samu na kusadisa bawu. Kikuma yawu yina mu ke bika yawu mutindu yina, kele samu mu salaka nsilulu mosi na beno. Kikuma yawu yina mu ke keba yawu mutindu yina, na sika yawu vwanda ya munu mosi. Na yawu, kana beno sala mutindu yankaka, ya ke kotisa yawu na organisation. Mpe ya kieleka mu ke teleminaka na ngolo nionso ba organisation. Na yawu mu—mu ke bika yawu kaka mutindu yawu kele, na maboko ya Nzambi, samu beto fula na kusala kisalu na Kimfumu ya Nzambi.

²³ Ntangu yayi, na suka yayi, beto zola longuka Ndinga yayi ya nkulu ya lusakumunu, mpe kukwikila.

²⁴ Ntangu yayi, mu zola tuba, diaka. . . Mu ke mona Mpangi Egan mpe bantu mingi, mwa ba administrateur yina kele awa, na manima ya kuvwanda na lukutakanu ya beto na ba administrateur, na nkokila yina; mpamba ve, mu ke tuba pwelele na ntuala ya yinzo-Nzambi, beno nionso ke diaka ve ba administrateur yina bawu me tula. Beno ke ba administrateur yina me soolama, mpe bankumbu ya beno kele na babuku. Mbote mingi.

²⁵ Mpe ntangu yayi ke vwanda diaka na nsodolo ya—ya ba diacre, mpe mutindu yina. Mpe Mpangi Neville, ke solula na bantu yina na manima ya bisambu, mbote mingi, mpe samu na

tresorier mpe yina yankaka, mutindu beto ke sungika yinzo-Nzambi. Beto ke sungika konso kima, pene-pene, na yawu, beto lunga vwanda na reveal mosi na ntangu ke kwisa.

²⁶ Ntangu yayi, na ntwala beto vutukisa na buku awa, samu na dilongi ya lukolo ya Lumingu, na Ndinga yayi ya kitoko ya Nzambi ya moyo, beto kulumusa bayintu ya beto, na ntangu fioti, mutindu beto ke tuba na Nsoniki ya Buku yayi. Mpe ntangu yayi beto basisa mabanza nionso, konso kima yina ke lweka, yina lunga sala ti beto baka ve lusakumunu.

Beto sambila.

²⁷ Nzambi ya kulutila busantu mpe ya kulutila mbote, beto ke kwisa ntangu yayi na Presence ya Nge ya nene, samu na kupesa Nge baluzingu ya beto, mpe bamoyo ya beto—ya beto, mpe banzutu ya beto, mpe bisalu ya beto, mpe bamayeke ya beto. Mpe nionso yina beto ke na yawu, beto ke pesa yawu na Nge. Mpe na mutindu Nge me tala na beto, Mfumu, kana kele na disumu mosi mpe yina beto fungunaka ve, beto ke lomba na Nge, O Mfumu Nzambi, ti Nge tula Menga ya Mwana na Nge, Yesu, na kisika yina. Na yawu, beto zaba ti beto me lunga ve na beto mosi, mpe ya ke mpasi samu na beto na kulunga na mutindu ya beto mosi. Kasi beto ke tula ntima na Menga ya Yandi ya ntalu, mpe lemvo ya Yandi yina pakulamaka samu na beto, ti beto bansumuki yina me lunga ve na kukwisa kilumbu mosi na Ntwala ya Nge, na kunataka na ntwala ya beto Menga yayi ya Mfumu Yesu. Nge, Yina, na ntangu me luta, ndimaka ti ya ke kaka Menga ya Mwana na Nge, mpe salaka nsilulu, ti, “Na nzila na Yandi, kana beto fungina masumu ya beto, masumu ya beto ke zimbana na nzila ya lemvo ya Yandi.”

²⁸ Mpe na ntangu yayi beto ke lomba, Mfumu, ti Nge lolula bifu ya beto nionso, konso disumu yina beto zaba to yina beto zimbanaka, mambi nionso, mpe kana dibanza mosi ya yimbi kotaka na moyo ya beto, ditolo-tolo ya tiya ya diabulu, ti Nge ke kula ntama mbeni ya Nge diabulu, mpe mbeni ya bantu ya Nge.

²⁹ Mpe beto ke lomba Nge na kutinda Mpeve-Santu na kuvwanda na Ndinga ya ntangu yayi, mutindu beto me kukipesa beto mosi mutindu bisadilu, ti Nge ke tuba na nzila ya beto, mpe ke kuwa na nzila ya beto, na nzila ya Ndinga ya Nge. Mpe bika ti beto baka Yawu mutindu yina me katuka na Nge, na mutindu beto ke katuka kisika yayi, bubu yayi, na nsatu ti beto me sungama diaka samu na Klisto; ti beto lenda na nsatu ya kulutila mbote samu na bisambu ya nkokila yayi mpe ya mbasi, samu na kutalama ya Mpeve-Santu.

³⁰ Sakumuna bambangi ya beto bisika nionso, bamabuundu nionso na yinza ya muvimba, yina ke tadisa Ndinga ya Luzingu na kilumbu yayi ya yimbi. Beto ke mona ti beto ke na ntangu mingi diaka ve ya kusalu, samu mpimpa ke kwisa na nswalu nionso. Matuti ya mvita ke kwisa diaka. Yimbi me kuma pene-

pene mingi, mpe beto ke sambila ti Nge ke sala ti beto ke sala ya kulutula bambala yina me luta. Pesa kupema na banzutu ya beto ya kulemba, Mfumu, mpe vutula beto na mvita. Samu beto ke lomba yawu na Nkumbu ya Mfumu Yesu, mpe samu na zola ya Yandi beto ke sambila. Amen.

³¹ Beto zibula, Biblia, na suka yayi, na kapu 11 ya Buku ya ba Hebreux.

³² Kilumbu ya tatu na nkokila beto vwanda tubila kapu 7 ya Buku ya ba Hebreux, samu na “Melkisedek, yina vwandaka na tata ve, mpe yina vwandaka na mama ve, yina vwandaka na mbatukulu ve, to nsuka ya luzingu ve.”

³³ Mpe mu banzaka ti, mbala yankaka, na suka yayi, yawu ke vwanda mbote na kuzibula diaka Buku yayi ya kulutula kitoko, na mutindu beto tubilaka yawu ntete, na kutanga yina me luta. Beto ke bika kapu 10, mpe kapu 9, yina ke tubila misuku ya munkayilu, samu beto kwisa kisika yayi ya “lukwikilu.” Mpe awa na Buku ya ba Hebreux, kapu 11, mpe kubanda na nzila 23, beto ke tanga Yawu mutindu yayi:

Na lukwikilu Moise, na ntangu yandi butukaka, bibuti ya yandi bumbaka yandi bangonda tatu, samu bawu monaka ti yandi vwandaka kitoko; mpe bawu vwandaka na boma ve ya misiku ya ntinu.

Na lukwikilu Moise, na ntangu yandi kumaka mbuta, mangaka ti ba bokila yandi mwana ya mwana ya Pharaon ya kento;

Yandi soolaka na kumona mpasi kintwadi na bantu ya Nzambi, na sika kuzinga na mikembo ya masumu ya nsungi yina;

Yandi monaka ti nsoni ya Klisto ke kimvwama ya nene kulutula bimvwama ya Egypte: . . . mpe yandi talaka na lufutu yina ke kwisa.

Na lukwikilu yandi basikaka na Egypte, kukonda kuvwanda na boma ya ntinu: samu yandi vwandaka ya kwikama, mutindu yina ke mona yandi yina ke monanaka ve.

³⁴ Mu zola baka yintu ya dilongi, na suka yayi, “kusoola na lukwikilu.” Mpe mu zola baka mutindu masonuku, bampova yayi tatu ya ntete ya kapu 23, *Na Lukwikilu, Moise*. Mpe, “kusoola na lukwikilu,” na konso kima yina beto ke sala, beto lenda soola kaka na lukwikilu. Mpe beto ke mona ti yina nionso Moise salaka, yina beto ke vutukila ntangu nionso, kele na lukwikilu; na kutala na meso ve, kasi na lukwikilu.

³⁵ Mpe kikuma mu bakaka lukanu ya kutubila yawu na suka yayi, samu yinzo-Nzambi ke mutindu yayi, samu na ba . . . ata mpe na balukolo ya beto, mpe pene-pene, beto me baka mayele mingi ya bantu. Samu na yayi, beto me nata bantu ntama na

lukwikilu. Mpamaba ve, lukwikilu ke kwisaka ve na nzila ya mayele ya bantu. Lukwikilu ke yina bantu ya mayele ke monaka ve. Mpe beto . . . Kana beto zimbana ve lukwikilu yayi ya kitoko, na yawu beto ke vwanda na mudidi ya nene, yawu . . . kutala ve mingi ya mayele ya beto, ata yinki mutindu beto lunga tendula Ndinga ya Nzambi, samu yawu vwanda ya kusungama mbote-mbote na mambu beto ke kwikilaka.

³⁶ Kele na mutindu yankaka ve ya kusepelisa Nzambi, kaka na lukwikilu. Masonuku ke ndimisa yawu mutindu yina, mpe ya ke na lukwikilu. “Mpe kukonda lukwikilu,” Masonuku ke tuba, “ya ke mpasi na kusepelisa Nzambi.”

³⁷ Mpamba ve, kana lukwikilu ke telemina mayele ya bantu, mpe mayele ya bantu ke telemina lukwikilu, yina ke tula bawu na nkabisa ya—ya mosi na yankaka, na yawu beto lenda soola kaka mutindu Moise salaka. Na lukwikilu beto ke kwikilu!

³⁸ Ntangu yayi, kana beto zimbana lukwikilu, Nzambi ke pesa mvutu ata fioti ve na bisambu ya beto. “Samu yina nionso ke kwisa na Nzambi lenda kwikila kaka ti Yandi kele, mpe mosi yina ke pesaka lufutu na bayina nionso ke sosaka Yandi.” Mpamba ve, kana beto zimbana lukwikilu, bisambu ya beto ke ya kufwa; beto ke baka kima mosi ve.

³⁹ Beto banza na yawu, na suka yayi, beto kangama kaka na lukwikilu. Na yawu, kana beto zimbana lukwikilu, kivuvu ya beto nionso ke kwenda. Mpe kana beto zimbana lukwikilu, kieleka ya beto ya kimpeve ke vwanda diaka ve. Mpamba ve, beno lunga vwanda ve na lukwikilu samu na mambu yina beno ke mona, samu bima yina nionso beno ke mona ke fwa.

⁴⁰ Kana beto tula ntima na mwa muntu mosi ya nene, longi ya nene, to dibuundu ya nene, nionso yina ke fwa, kilumbu mosi. Mpe kana beto tula ntima na yinsi ya nene, to na makesa ya nene, nionso yina ke fwa, kilumbu mosi. Mpe na yawu beto lenda zinga kaka na lukwikilu, ya mambu yina bantu ya mayele ke monaka ve. Kele na lukwikilu beto ke kwikilaka.

⁴¹ Ntangu yayi, beto ke vidisa nkembo ya beto kana beto vidisa lukwikilu. Ntangu yayi, kana beto kwenda ntama na lukwikilu, na yawu beto ke kotisa dibuundu na sika ya mayele ya bantu.

⁴² Mpe na bambala mingi, bantu ke banza ti, samu beto ke kimvuka ya bantu mingi, samu beto ke na dibuundu ya nene mingi, mpe beto ke na yinzo-Nzambi ya nene, bayinzo-Nzambi ya kulutilla yinda, mpe bantu ya nene, beto ke na bilele mingi ya kitoko, ya bunkete, mpe ya mbongo mingi, yina ke sala ti bawu sumba bima yina, beto, na bambala mingi, beto banzaka ti beto vwanaka ya kutwadisama na kimpeve, ti yinzo-Nzambi fwana vwanda yina me twadisama na kimpeve. Mpamba ve, beto ke baka mbandu ya balongi ya luswaswanu yina ke kwenda na sika ya kulonga mpe ke vwanda na bantu mingi, mpe beto ke banza ti, na bantangu yankaka, ti bawu kele bidimbu ya lutwadusu ya

kimpeve. Kasi nionso yina ke kieleka ve. Yina ke lutwadusu ya kimuntu.

⁴³ Kasi kusala luzolo ya Nzambi ke nata lutwadusu ya kieleka ya kimpeve. Beno me mona? Ata ti ya ke muntu mosi, to bantu mingi. Ata ti ya ke yinzo-Nzambi ya nene, to yinzo-Nzambi ya fioti, yawu ke na mfunu ve. Ata ti yandi ke muntu ya nene, na nzonzolo ya kitoko, to muntu yina zaba ve ABC ya yandi, yawu ke na mfunu ve. Yawu ke kaka nsangu yina yandi ke longa, to yawu me twadisama na Ndinga ya Nzambi, to, yawu me twadisama na mayele ya bantu?

⁴⁴ Bantu yankaka lunga twadisama na kimpeve samu na nzonzolo ya kitoko ya muntu mosi. Yina zola tendula kima mosi ve. Bantangu yankaka beto me twadisama samu muntu yina me longukaka mingi ti yandi lunga longa nsangu ya yandi kuna. Yina zola tuba ve ti yawu ke Nzambi. Beno me mona?

⁴⁵ Ya ke kaka na nzila ya Nzambi ya kukonda nsuka, Ndinga ya lusakumunu ya Kukonda nsuka, beto lunga kuzwa lutwadusu ya kimpeve, mpe yina me pesama na Mpeve-Santu. Na lukwikilu beto ke kuzwa yawu.

⁴⁶ Ntangu yayi beto banza na Moise, mpe na ntangu yayi ya nene ya luzingu ya yandi. Mpe beto ke tanga disolo ya yandi, lubutuku ya yandi, mpe mutindu Nzambi kebaka yandi, kasi kwisaka ntangu mosi na luzingu ya Moise yina yandi lendaka soola. Kana beto tanga mbote, beto ke mona ti yandi vwandaka mwana ya mwana ya Pharaon ya kento, mpe yandi vwandaka kilandi ya kiti ya kimfumu, mpe lungaka vwanda pharaon na bilumbu ke kwisa na Egypte. Na yawu, na ntangu yandi kumaka mbuta mpe zabaka kiyeka yandi vwandaka na yawu, mpe na kumonaka pene-pene ya yandi bampika yina vwandaka timuna kuna na kati ya poto-poto. Mpe Moise, talaka na banela ya yinzo ya kimfumu, bampika mosi yina Pharaon vwandaka tala, kasi yinki luswaswanu vwandaka na mutindu na yandi ya kutala bawu.

⁴⁷ Mu zola sikimisa dibanza ya beto kuna, na suka yayi, na mwa ntangu fioti, mpe Nzambi ya Zulu kutula yawu na kati ya konso ntima awa. Ya ke mutindu ya beno ke tala, yina ke sala luswaswanu.

⁴⁸ Evangeliste ya nene, John Sprawl, yina balulaka ntima na nzila ya ministere ya Mpangi Bosworth, mingi kati ya beno zaba yandi tuka bamvula mingi, ya Old Glory Barn. Yandi tubaka ti, kilumbu mosi yandi salaka nzietelo mosi, na ntwala ya lufwa nkundi ya yandi ya zola mpe kento ya yandi. Bawu vwandaka na La Salle, Lorraine, France. Mpe mu zwaka ntangu ya mbote ya kutala kisika yina. Mpe ntwadisi nataka bawu na bilanga mosi, mpe songaka bawu bima mingi ya luswaswanu. Mpe bawu kumaka kisika ya kiteki ya Mfumu Yesu, na kulunsi. Mpe Tata Sprawl vwandaka ya kutelema ntama, ke tala yawu, yandi

mpe kento ya yandi, mpe, na kati ya bantima ya bawu, bawu vwandaka tubila yina lungaka vwanda dibanza ya atisiti, to kitungi, mpamba ve, na ntangu yandi zengaka ditadi yina, yawu monikaka kima mosi ya boma yina lendaka talisa mpasi mpe zola mpe kukabula mawa ya Mfumu Yesu, kasi yina vwandaka mpasi mpe kiadi mingi na kutala. Mpe ntwadisi kwisaka na Tata Sprawl, mpe yandi tubaka, “Tata, mu banza ti nge ke tubila kiteki yayi ya Mfumu Yesu.”

Mpe yandi tubaka, “Mutindu yina.”

⁴⁹ Mpe yandi tubaka, “Mu ke na mwa ngitukulu ve, samu bantu nionso yina ke talaka yawu, ntete, bawu ke tongaka yawu.”

⁵⁰ Mpe Tata Sprawl tubaka, “Samu na yinki, mu lunga vwanda na mawa mosi ve to lutwadusu mosi ve ya kimpeve na ntangu mu ke tala kima ya mutindu yayi, na yawu mu ke kukiyufula samu na yinki kitungi salaka yawu mutindu yayi.”

⁵¹ “Mpe kitungi. . .” Yandi tubaka, “Tata Sprawl, kiteki yayi ke mbote mingi, mpe kitungi vwandaka na kima ya mbote na mabanza ya yandi. Kasi diambu kele, na nge. Ya ke mutindu nge ke tala yawu.” Mpe yandi simbaka yandi na diboko mpe kento ya yandi, mpe twadisaka bawu na autel mosi kuna na nsi ya kulunsi yina. Mpe yandi tubaka, “Ntangu yayi, Tata Sprawl, tala na zulu ntangu yayi.” Mpe na ntangu yandi talaka na zulu, yandi tubaka ti ntima na yandi vwandaka pene-pene na kubwisa yandi. Yinki luswaswanu yawu vwandaka, kuvwanda kuna mpe kutala yawu mutindu *yina*, mpe kufukama mpe kutala yawu na mutindu yawu lombaka kutala yawu.

⁵² Mpe Nzambi ke mutindu yina. Yawu ke mutindu mosi na lukwikilu. Ya ke mutindu beno ke tala yawu. Kana beno tala yawu mutindu Biblia mosi ya masolo, diambu yina salamaka ntama, beno ke vwanda na kiyeka ata fioti ve ya kuzaba mfunu ya kieleka ya Biblia. Beno fukama, mpe kutumama na misiku ya Biblia yayi, mpe kutala Yawu na meso ya Mpeve-Santu.

⁵³ Mu zola yufula bantu yayi, na suka yayi. Yinki mbote Nzambi ya masolo ke sala na beto kana Yandi kele ve Nzambi ya mutindu mosi? Yinki mbote Nzambi, yina bakaka Moise mpe salaka bimangu yina yandi salaka na yandi, yinki mbote yawu lunga sala na beto na kutanga masolo ya Nzambi ya mutindu yina kana Yandi ke mutindu Mosi ve bubu yayi? Yinki mbote lunga sala Nzambi yina vulusaka bana Hebreux, na dibulu ya tiya, kana Yandi ke Nzambi ya mutindu mosi ve bubu yayi? Yinki mbote lunga sala Nzambi yina sambisaka mambote mpe yimbi, na kilumbu yina me luta kana, mpe pesaka ndola na yimbi mpe sakumunaka mambote, kana Yandi ke Nzambi ya mutindu mosi ve bubu yayi? Samu na nki beto ke kwendaka na yinzo-Nzambi? Samu na nki beto ke manga bima ya yinza, kana Yandi ke Nzambi ya mutindu mosi ve yina ke sambisa mutindu mosi, mpe na dibanza mosi yina Yandi ke vwandaka na

yawu? Yinki mbote ke sala Nzambi yina lungaka simba diboko ya kento yina vwandaka na tiya ya ngolo na nzutu, mpe kumanisa tiya ya nzutu, kana Yandi ke Nzambi ya mutindu mosi ve bubu yayi? Yinki mbote ke sala Nzambi yina lungaka basisa nkundi ya Yandi na ntoni, yina fwaka tuka bilumbu mingi, kana Yandi ke Nzambi ya mutindu mosi ve bubu yayi?

⁵⁴ Na lukwikilu beto ke kwikila ti kilumbu mosi ya nkembo Yandi ke basisa beto na ntoto, ata ti beto me kuma lutu ya mbombi. Yinki mutindu kusikimisa yawu? Beto ke sikimisa yawu ve. Beto ke kwikila yawu. Ba me lomba beto ve na kusikimisa kima mosi. Ba me lomba beto na kukwikila yawu.

⁵⁵ Na lukwikilu Moise salaka *yayi mpe yina*. Mpe Moise, ntwenia ya bakala, talaka bampika, na nela ya yinzo ya ntinu, yandi monaka kibuka ya bampika ya nzanzi, ya mvindu mingi, na poto-poto yina Pharaon vwandaka tala.

⁵⁶ Mpe na ntangu Pharaon talaka bawu, mpe ba Egyptiens, bawu vwandaka kima yankaka ve kasi kibuka ya bampika. Bawu vwandaka mbote kaka samu na mambu yina; kuvwanda kaka bamasini ya kubalula poto-poto, samu kusala babiliki ya poto-poto samu na bambanza yina Pharaon vwandaka tunga. Ya ke mutindu yina ba Egyptiens mpe Pharaon talaka bampika yina.

⁵⁷ Kasi Moise, na ntangu yandi talaka bawu, yawu vwandaka kutala mosi ya luswaswanu yina Moise vwandaka na yawu. Na ntangu yandi talaka, na nela, bilungi ya bawu ya kukota na kati, masa ya meso ke kulumuka na matama ya bawu, mpe banzutu ya bawu ya kufumbama, yandi talaka bawu mutindu bantu ya Nzambi. Yandi talaka bawu mutindu bampika ve. Yandi talaka bawu mutindu bantu yina Nzambi soolaka.

⁵⁸ Mpe, oh, mutindu mu ke kwendaka, na yinsi mosi na yinsi yankaka, mpe mbanza mosi na mbanza yankaka, samu na kulonga! Kubanda mu bikaka tabernacle yayi, kisika ke yambaka bantu nionso, na musiku mosi ve kasi zola, buku yankaka ve kasi Biblia, mpe credo mosi ve kasi Klisto, mu ke talaka bana ya Nzambi, mpe bayina me losama, mutindu bantu yina Nzambi soolaka mpe zabaka na ntwala. Mu ke yufula bawu ve kana bawu ke ya Branham Tabernacle. Mu ke yufulaka bawu ve kana bawu ke ba Methodiste, to kana bawu ke ba Presbyterien, to kana bawu ke ba Pentecotiste, to ba Nazaréen, to ba Pelerin de la Sainteté. Mu zola tala bawu kaka mutindu bantu ya Nzambi. Mpe kumona na bisalu ya bawu mpe luzingu na bawu, ti bawu ke bamisadi ya Mfumu Nzambi. Mpe ntima na munu zola vwanda na ngwisani na bawu, kukonda kutala nkumbu ya bawu. Mu zola kaka ngwisani ya bawu. Mu zola bawu samu mu zaba ti bawu ke bantu ya Nzambi.

⁵⁹ Na ntangu mu ke mona kento mosi ke kwisa kuna na bala-bala, na robe ya yinda, mpe na bansuki na yandi ya kuyidika

mbote-mbote na mukongo na yandi, mpe—mpe me lwata robe mosi na mutindu ya mbote; mpe mu tala diaka kuna mama mosi ya ntwenia, mbala yankaka ya bamvula mosi na yandi, me lwata mwa kupe; yandi lunga vwanda, na kutala na meso, mbala zole kitoko kuluta kento yina na bansuki ya yinda, na kulanda kutala ya yinza, kasi mu ke vwanda na lweka ya kento yina me lwata mutindu Muklisto. Ata ti bawu lunga seka yandi, mpe ke bokila yandi mulandi-landi mosi, na nionso, mu ke vwanda na yandi. Yandi lunga vwanda kitoko ve mutindu kento yina yankaka, na kutala na meso, kasi yandi ke mona kima mosi. Na lukwikilu yandi ke tala Yandi Yina ke monikaka ve na meso, Yina ke twadisa luzingu na yandi.

⁶⁰ Na ntangu mu ke mona bakala mosi na ksalu, yina me bokilama “diacre,” to “longi,” to “mulandi-landi,” samu yandi ke manga na kunwa makaya, mpe ke manga na kunwa biere, mpe ke manga na kukwenda na makinu ya nkokila, mutindu bayankaka, mpe ba ke bokila yandi “mulandi-landi,” ntima na munu ke kabula mpasi na yandi. Yandi ke mpangi ya munu, awa na ntoto yayi ya Egypte, yina ke sala ti bantima na beto kuyamba yandi mpe kutuba, “Mpangi, beto bapaya mpe banzenza, na ntoto yayi, mpe mu ke vwanda kaka na ngwisani na nge.”

Moise lendaka sala kusoola, kusoola na lukwikilu.

⁶¹ Bantwenia yikwa lungaka sepela na kuvwanda mwana ya mwana ya Pharaon ya kento! Bantwenia yikwa lungaka sepela na yina Moise kutanaka na yawu, kusepela na biese nionso mpe mambu ya yinza, kukuma ntinu ya Egypte, kuyala yinza ya muvimba! “Yinki bulawu,” bantwenia ya bilumbu na yandi lungaka banza, “ti Moise soolaka sika na yandi na bantu ya Nzambi ya kiadi mpe ya mpasi.”

⁶² Samu na nki yandi salaka yawu? Na lukwikilu, na ntangu yandi telemisaka meso ya yandi, yandi talaka na zulu ya mambu ya yinza yayi. Yandi talaka na zulu ya biese ya masumu. Mpe Biblia ke tuba ti yandi kwikamaka mutindu ke mona Yandi Yina ke monikaka ve na meso, na lukwikilu, yandi soolaka na kusadila Nzambi kukonda kutala yina lungaka vwanda.

⁶³ Yawu me sobaka ve. Mingi kati na beto lunga kwenda na yina beto ke bokila yinzo ya kulutila kitoko. Beto lunga sepela, mbala yankaka, na ngwisani mpe kiese mingi na kuvwanda na biti ya kulutila kitoko. Beto lunga vwanda bayina me zabana mingi, kunwa malafu mpe makaya, mpe kulwata mpe kuzinga mutindu yinza. Kasi yinki salamaka? Beno me telemisa meso ya beno, mpe na lukwikilu beno me mona Yandi Yina ke monikaka ve na meso, mpe beno me baka sika na bayina me losamaka mpe bayina ba ke bokila ba exalté ya bilumbu yayi. Samu na lukwikilu beto ke mona Yandi Yina ke monikaka ve na meso, beto me soola bampasi mpe kiadi.

64 Mu lunga tuba na bantu ve na kusoola kiadi. Mu ke tuba ve ti beno soola bampasi. Ya ke kima muntu lunga sala ve. Kasi kana bampasi kukumina beto, na yawu beto ndima yawu mutindu yawu ke kwisa. Mu zola ve ti beno sala diambu mosi samu muntu mosi kuseka beno. Mu ke zola ve ti beno tuba mambu ya luswaswanu, ti, “Mu ke . . . Mu ke na dibuundu yina ke kwikilaka ve *yayi mpe yina*, ya yinza,” mpe mambu ya mutindu yina, kaka samu bantu kuseka beno. Beno ke sala ti yawu salama mutindu yina. Mu lunga tuba na beno ve na kubasika awa mpe beno sala diambu yina ke mbote ve. Mu lunga tuba na beno ve na kusala mutindu yina, na mutindu ti muntu mosi lunga tuba ti beno ke mulandi-landi. Beno ke sala ti yawu salama mutindu yina. Kasi kana yawu kumina beno na sika ya beno ya kusalu na Nzambi, bika yinza kutuba yina bawu zola tuba. Beno kwenda na ntwala.

Beno soola. Konso bakala mpe kento fwana sala yawu.

65 Yinki lungaka salama kana Pharaon monaka yina Moise monaka? Yandi monaka bampasi ya bantu. Yandi zabaka ntalu yina lendaka futa. Kasi na lukwikilu yandi soolaka yawu, na sika ya kusepela na biese ya masumu.

66 Mbala yankaka kele na mwa, bantwenia ya bamama yina me vwanda awa, bantwenia ya bakento ya kitoko. Yinza lunga tuba na beno, “Sala *yayi mpe yina*. Nge ke kitoko mingi. Nzutu ya nge me salamaka mbote-mbote. Nge fwana songisa yawu.”

67 Kasi, mpangi ya munu ya kento, telemisa meso ya nge mpe tala na zulu na yawu, na Yandi yina tubaka, “Ya ke disumu samu na kento na kulwata lele yina ke fwanana na yina ya babakala.”

68 Kana babakala pene-pene ya beno, kana bakento yina ke kwisa tala beno, tuba, “Zengisa bansuki yina ya yinda. Ya ke pesa nge mupepe ya mbote. Yawu lunga vwanda *yayi, yina*, to *yina yankaka*.” To, “Yawu ke vwanda mbote mingi.” Kuwa mambu yina ve!

69 Beno telemisa meso ya beno, mpe na lukwikilu beno tala Yandi yina tubaka ti, “Bansuki ya kento ke nkembo na yandi, mpe yandi lunga zengisa yawu ve.”

70 Kana bawu tuba, “Yawu ke zabana mingi. Nge ke vwanda mbote na sika ya kusalu na nge, to na mfumu na nge ya kusalu, kana nge lunga nwa malafu ya kimvuka. Kana nge lunga nwa makaya mutindu bakento yankaka, nge lunga vwanda mbote na kimvuka ya bankalani na nge.”

71 Na lukwikilu beno telemisa meso ya beno na zulu mpe beno tala na Yandi Yina tubaka, “Kana beno kumisa nzutu yayi mvindu, mu ke bebisa yawu.” Na lukwikilu beto ke kwikila mambu yina. Ya ke kima yina beno ke mona na meso ve. Ya ke kima yina beno ke kwikila. Na lukwikilu, Moise salaka yawu.

72 Mpe na nzila yayi ya lukuwikilu, ke kwisa ntangu mosi ya kusoola.

73 Lot salaka kifu mosi ya mawa mutindu beto ke sala. Na bantangu yankaka beto ke soola samu na mambote ya beto mosi. Beto ke soola yina ke monana ya kulutila mbote samu na beto.

74 Na bantangu yankaka kana mwa makelele mosi kukwisa na kati ya yinzo-Nzambi, mpe muntu mosi kutuba, “Mbote, diacre to pasteur ke na lweka yayi.” Kutala yina ve. Tala kima ya mbote. Sukisa kima yina mpe tula ngwisani na kati ya bawu zole. Yina ke mbote mingi.

75 Kele na kusoola mosi. Mpe beto ke soola na mutindu na beto mosi. Beto ke soola kima yina ke sepelisa beto.

76 Kasi Moise soolaka kiadi mpe nsoni, ti yandi tambula na bantu ya Nzambi. Beno banza yawu ntangu yayi. Beno wa yayi. “Yandi soolaka kuvwanda na kiadi na bantu ya Nzambi, mpe monaka yawu mutindu kimvwama ya kulutila nene, yandi kwikamaka, na kumonaka Yandi Yina ke monana ve.”

Ntangu yayi, Lot, na ntangu mosi, lendaka sala kusoola mosi.

77 Mpe yawu lunga salama ti, na suka yayi, babakala mpe bakento yina me vwanda awa, yina ke soola mbala ya nsuka. Beno ke yina beno kele bubu yayi, samu na bamvula mingi me luta beno soolaka na kuvwanda yina beno kele bubu yayi. Mpe yina beno ke soola ntangu yayi ke talisa yina beno ke vwanda na bamvula tanu ke kwisa. Na bamvula tanu ke kwisa beno lunga vwanda mupanzi-nsangu. Na bamvula tanu ke kwisa beno lunga vwanda Muklisto mosi ya lukumu mingi.

78 To, bamvula tanu ke kwisa beno lunga vwanda na difelo, samu beno bakaka lukanu ya yimbi. Bamvula tanu ke kwisa beno lunga vwanda na nganda mosi na kukombula na bisika ya kosukosu. Bamvula tanu ke kwisa, beno lunga vwanda kento ya pite na bala-bala.

79 To, beno lunga vwanda bakala to kento ya—ya mfunu mingi na konso kompani yina, samu na kusoola yina beno salaka samu na Klisto. Bamvula tanu ke kwisa beno lunga vwanda na Nkembo, me kwenda na Enlevement, samu beno soolaka bubu yayi.

80 Kasi beno lenda soola kaka. Mpe beno tala ve na yina beno ke mona na meso. Beno soola yina beno ke mona na lukwikilu. Kima mosi kaka ya mfunu, kele yina beno soolaka na lukwikilu.

81 Lot, mpe lendaka soola. Abraham pesaka muswa na Lot samu na kusoola.

82 Mpe Nzambi ke pesa beno muswa ya kusoola. “Beno soola bubu yayi nani beno zola sadila.” Na kilanga ya Eden vwandaka na yinti ya—ya mazaya, mpe Yinti ya Luzingu. Muntu vwandaka na ntangu ya kusoola yina yandi zola. Mpe ya ke mutindu mosi bubu yayi. Beno ke na muswa, na kimpwanza nionso, na kusoola yina beno me zola.

⁸³ Tala ndongisila ya munu, ti, beno tala ve bima ya bilumbu yayi yina ke ziunga beno, mpe kuzabana ya bantu mpe kitoko yina beno lunga vwanda. Kasi beno soola, kaka, na lukwikilu, Yandi yina pesaka nsilulu ti kilumbu mosi Yandi ke kwisa mpe ke sungika bifu nionso, mpe ke pesa beno Luzingu ya Kukonda nsuka, mpe ke vumbula beno na lufwa. Ata ti beno ke baka nzila ya kiadi ya mwa bantu ya Mfumu, beno soola kaka mutindu yina. Ata ti beno na bampasi, ata ti beno ke na bampasi na yinsi, ata ti beno ke na bampasi na dibuundu, ata ti beno ke na bampasi na dibuta, yawu vwanda konso kisika yina, beno soola kaka, “Na lukwikilu, mu ke sadila Nzambi. Mu ke kulumusa ntima ya munu na Ntwala na Yandi. Mu ke baka nzila na bana ya Nzambi. Ata ti mu ke mona ti ba ke sawula bawu mpe me losa bawu, mpe ke manga bawu mpe ke seka bawu, kasi mu ke bikala kaka sika ya munu ya ksalu. Mu ke vwanda na bawu. Mpe na ntangu bawu ke dila, mu ke dila na bawu. Mpe na ntangu bawu ke vwanda na kiadi, mu ke vwanda na kiadi na bawu. Mutindu bawu ke zinga, mu ke zinga mutindu yina.”

⁸⁴ Mutindu Naomi tubaka...To, Ruth tubaka na Naomi, “Banzila na nge ke vwanda banzila na munu. Banzila na munu ke vwanda banzila na nge. Kisika nge ke zinga, munu mpe ke zinga kuna. Kisika nge ke kwenda, munu mpe ke kwenda. Nzambi yina nge ke sadila ke vwanda Nzambi na munu.” Beno soola mutindu yina, ata ti ya ke katula mpusu ya bumuntu ya beno ya kati, yina ke nata beno na kubanza ti beno ke muntu mosi. Beno kukikatula mpusu yina mpe beno baka nzila yina mwa bantu yina ya Mfumu, mpe beno vwanda na kieleka na kisika ya kulonga mpe kisika ya beno ya ksalu.

⁸⁵ Lot talaka pene-pene ya yandi. Yandi tubaka, “Mu ke na kusoola mosi.” Mpe yandi talaka kuna na Sodome. Yandi monaka bilanga ya matiti ya kitoko kulutula yina Abraham monaka, mpe ya kitoko kulutula kisika yina Abraham vwandaka zinga. Yandi monaka bisika ya matiti ya mbote samu na kudisa bangombe na yandi, samu na kuvwanda na bangombe ya nene mpe ya kulutula mbote.

⁸⁶ Mu banza ti mu ke lwadisa ve bansatu ya muntu mosi. Kasi yina ke mutindu ya balongi mingi, kukakula Nsangu ya mbote, ke banza kubaka mbongo mingi na nzila na yawu. [Mpangi Branham me bula maboko na yandi mbala tatu—Mu.] Kima ya kuzwila mbongo! Mu ke zola vwanda na ntoto ya kuyuma, kudia, kunwa na mwa-masa ya fioti, mpe kudia mwa dimpa ya kuyuma, na sika kukakula kundima ya lukwikilu ya munu na Ndinga ya Nzambi ya moyo. Mu ke baka nzila yina.

⁸⁷ Bayankaka kati na bawu tubaka, “Billy, yina ke tambula mbote ve na balukutakanu na nge, ya ke monana ti ke na ba Pentecotiste mingi kuna.” Longi mosi ya nene ya denomination tubaka mutindu yina.

Mu tubaka, “Denomination na nge ke simbisa na mbongo balukutakanu na munu?”

⁸⁸ Ntama mingi ve, na magazine *Look*, mu banza, vwandaka na journal mosi. Mpe nsoniki tubaka kuna, yandi tubilaka ba Pentecotiste. Yandi tubaka, “Dibuundu ya ba Pentecotiste ke dibuundu yina ke kuma na nene mingi na yinza ya muvimba bubu yayi.” Samu na nki? Ya ke samu babakala mpe bakento me telemisa meso na bawu mpe me tala ntama kuna.

⁸⁹ Mpe nsoniki sikisaka diaka ba Pentecotiste. Oh, ya kieleka, yandi tubaka, “Bayankaka kati na bawu me kwenda na lweka mosi, mpe mutindu yina. Kasi, ba Methodiste ke sambilaka credo mosi. Bawu ke sambilaka Nzambi na nzila ya credo. Ba Baptiste ke salaka mutindu mosi, mpe ba Presbyterien. Kasi Pentecotiste ke sambilaka na Biblia ya yandi.”

⁹⁰ Na lukwikilu beto ke mona nsilulu. Mu ke vwanda na bawu, kukonda kutala yinki mutindu ba ke sawula bawu, mu ke vwanda kaka mosi na bawu. Ata ti ba ke seka bawu, mpe ata ti bawu ke na kumata mpe kukulumuka, mutindu Israel vwandaka na yawu, mu ke vwanda ata fioti ve na zulu ya mongo na lweka ya profete ya luvunu, Balaam, mpe kumeka kusinga yina Nzambi sakumunaka. Samu, na lweka yayi ke na Ditadi yina bulamaka, mpe Munkayilu ya menga, mpe Dikunzi ya Tiya. Kukonda kutala sika bawu kele, yawu yina ke twadisa bawu na lunungu, mpe bawu ke nunga kaka, samu bawu ke bantu ya nsilulu yina ke tambula na lukwikilu. Mpe bawu vwandaka denomination mosi ve, bawu vwandaka banzenza, mpe mutindu mosi na bantu ya Nzambi. Kasi mu zola tambula na bawu, kuvwanda na ndonga na bawu; na denomination na bawu ve, kasi na ngwisani ya bawu pene-pene ya mambu ya Mpeve ya Kukonda nsuka ya Nzambi, samu, na lukwikilu mu kuzwaka mbotika ya Mpeve-Santu. Nzambi kusadisa munu na kuvwanda kaka na dibanza ya mutindu yina.

⁹¹ Beno bambuka moyo. Mutindu bawu vwandaka kwenda, beto ke mona ti Lot monaka bisika ya mbote samu na kuvwanda na bangombe mingi. Mingi ke mona ba portefeuille ya nene mingi. Mingi ke mona bisika ya kulutula mbote na kati ya bantu. Yandi monaka ntangu ya mbote samu na kuzwa ba dollars mingi. Yandi monaka ntangu ya mbote ya kuvwanda mfumu ya mbanza. Yandi vwandaka nzenza, mpe muntu ya ya mayele mingi, na mutindu yandi vwandaka, “Mbala yankaka mu ke vwanda mfumu ya mbanza.” Yandi monaka ntangu ya mbote samu yawu vwandaka na ntuala na yandi. Kasi yandi monaka ve tiya yina lendaka bebisa yinsi. Yandi kukinungisaka, yandi lungaka kundima ve ti yinsi vwandaka ya kufuluka na masumu, mpe Nzambi lungaka bebisa yawu.

⁹² Mpe, bubu yayi, bantu ke meka na kukinungisa na kutubaka, “Nge ke . . .?”

Mu ke tuba, “Nge ke Muklisto?”

⁹³ Bawu ke tuba, “Mu ke Americain.” Yina zola tuba kima ve mutindu kumeka kutuba na ngoy-ngoy ti yandi ke kaswamba. Yina ke sala kima mosi ve. [Mpangi Branham ke bula maboko na yandi mbala mosi—Mu.]

⁹⁴ Yandi ke beba, samu Nzambi ke ya kieleka. Mpe kana Amerique ke vwanda pima na masumu na yandi, Nzambi ya kieleka mpe ya kiyeka nionso, mpe ya santu me tindaka na ngolo nionso na—na kuvumbula na lufwa Sodome mpe Gomorrhe mpe kulomba bawu ndolula samu ya yokaka bawu na tiya, samu na masumu ya bawu; kana Yandi bika beto pima.

⁹⁵ Kana Yandi bika beno kota na Zulu na bisalu na beno ya yimbi, Yandi ke vumbula na lufwa Ananias mpe Saphira mpe kupesa bawu ntangu yankaka ya mbote. Ya kieleka Yandi lunga sala yawu. Kasi Yandi ke ya kieleka. Ananias monaka mbongo na yandi. Pierre monaka Klisto.

⁹⁶ Oh, la la! Lot monaka ve kubeba ya bana na yandi na kisika yina.

⁹⁷ Mingi kati na beno, bubu yayi, me kangamaka pene-pene ya ba credo ya nkulu ya mpamba-mpamba mpe bima yayi nionso, beno ke mona ve buyawuli ya bana mpe kubeba ya bana na beno. Beno ke mona ve mwana na beno ya kento na yinzo ya pite. Beno ke mona ve mwana na beno ya bakala ya kinwa-malafu, to kisika mosi kuna na mesa ya bansaka ya kalati.

⁹⁸ “Samu ya ke ya kufuluka na masa ya mbote.” Mpe disumu bawu ke tubila yawu ve. Yandi monaka ve kento na yandi, twadisi ya bakompani yina nionso, kukituka kiteki ya mungwa, na ntangu yandi vwanda tala. Yandi kukimonaka ve ke tina na na nswalu nionso, kisika mosi kuna na mwa mbanza yina kuna, samu na kuvulusa luzingu ya yandi. Yandi monaka yina ve, samu yandi talaka kaka yina vwandaka na ntuala na yandi.

⁹⁹ Kasi, Abraham, talaka ve ntoto ya kufuluka na masa ya mbote, yandi telemisaka meso na yandi mpe monaka kilumbu ya mbasi, samu yandi lendaka baka bima nionso. Muklisto ya kieleka bubu yayi ke telemisa meso na yandi mpe ke mona nsilulu ya Klisto: “Kiese na bantu ya pima samu bawu ke baka bima nionso. Bawu ke baka ntoto.” Muklisto ya kieleka, na lukwikilu, ke telemisa meso mpe ke mona yina. Bokila yandi yina nionso beno me zola. Yandi telemisaka meso na yandi. Mpe na ntangu yandi salaka mutindu yina, Nzambi tubaka, “Abraham, tambula na kati ya yinsi, yawu nionso ke ya nge.” Na lukwikilu, Abraham salaka mutindu yina; lukwikilu mosi yina Moise vwandaka na yawu.

¹⁰⁰ Ya me sonamaka na kinzololo ya muntu mosi, yina tubaka mutindu yayi. Mu banza yawu vwandaka bandinga mosi ya kitoko mingi. Ti Abra-. . . “Moise bakaka yinza ya kitoko mingi mpe tulaka yawu na kitezolo mosi; mpe bisambu ya

kulutila yimbi, mpe yandi tulaka yawu na kitezolo yankaka; mpe bisambu ya kulutila yimbi vwandaka na kilo mingi kulutila yinza ya kitoko mingi.”

¹⁰¹ Yawu ke mutindu mosi bubu yayi, ti kana bawu bokila beto na bankumbu nionso ti, “balandi-landi,” to “Baminganga ya bunzambi,” to “saint-exalté,” to konso nkumbu yina bawu zola bokila beto. Beto yina ke ya kulutila yimbi ke vwanda na kilo mingi kulutila yinza ya kulutila kitoko yina bawu ke na yawu. Ata ti bawu bokila beno “bantu ya nkulu, bantu ya mabanza ya nkulu, balandi-landi.” Ya ke vwanda na kilo mingi kulutila kima yina ya kulutila mbote diabulu ke pesa beno. Ya kieleka.

¹⁰² Moise ndimaka kiadi ya Klisto. Yandi monaka Klisto na ntwala. Tuka ntama yandi tubaka mwa bandinga ya lutwadusu ya kimpeve samu na Yandi. “Beni tala, Mfumu Nzambi ya beno ke basisila beno profete mosi mutindu munu.” Yandi zabaka yawu. Yandi monaka Yandi na ntwala, mpe yandi ndimaka kiadi na Yandi mutindu kimvwama ya nene mingi kulutila bima nionso ya yinza.

¹⁰³ Nkundi Muklisto, nge lunga sala mutindu yina ve, bubu yayi? Mpe bima nionso mpe kuzabana mingi ya yinza, na lukwikilu, beto ke mona Yandi yina pesaka nsilulu. Mpe mutindu ya kulutila yimbi ya dibuundu bubu yayi, na mutindu na yawu nionso, Yawu ke vwanda kaka na kilo mingi kulutila konso kima yina diabulu lunga pesa beno. Ata ti beto ke kabwana, ata ti beto ke zengana bitini-bitini, ata ti beto ke bulangana mpe ke kukikabisa, na ba denomination mpe na bulandi-landi, ya ke vwanda na kilo mingi kulutila yina diabulu ke pesa beno. Ya kieleka.

¹⁰⁴ Yandi ndimaka kiadi ya Klisto mutindu kimvwama ya nene mingi kulutila bimvwama nionso ya Egypte. Na yawu yandi lendaka sala kaka kima mosi. Yandi basikaka na Egypte. Oh, mu zola kima yina. Yandi basikaka na Egypte. Tala, yandi vwandaka tala na nela mosi yina, kasi yandi vwanda tala na mutindu ya luswaswanu na Pharaon. Yinki lungaka salama kana Pharaon lungaka mona nsuka na yandi? Yinki lungaka salama kana Pharaon lungaka mona yinsi na yandi ya kifuluka na masa? Moise monaka yawu. Yinki mutindu? Na mayele ya bantu? Na lukwikilu, Moise monaka yawu. Konso kima yina yandi salaka vwandaka na lukwikilu, samu Nzambi silaka na Abraham, tata na yandi, ti Yandi lunga—Yandi lunga kwisa tala yinsi yayi na manima bamvula nkama yiya, mpe kubasisa bawu kuna. Mpe na lukwikilu, Moise kwikilaka Ndinga yina Nzambi tubaka, mpe zabaka yandi mosi, na lukwikilu, yandi soolamaka ntwadisi samu kubasisa bawu kuna. Yandi zabaka sika na yandi. Yandi bakaka sika na yandi na kati ya poto-poto, mutindu bantu ya bisalu ya poto-poto, mpe ndimaka kiadi ya Klisto mutindu kimvwama ya nene mingi kulutila kuvwanda na kiti ya kimfumu ya Egypte. Yandi bakaka... Yandi tubaka ata fioti ve ti, “Mu

ke kabula mpasi na bawu.” Yandi bakaka kisika na bawu mpe kwendaka na bawu! Nkembo na . . . Yandi bakaka sika na bawu. Yandi kwendaka na bawu.

¹⁰⁵ Na ngitukulu ve ti nsoniki yina twadisamaka na kimpeve tubaka ti:

Mu ke baka nzila na bantu fioti ya Mfumu.
 Mu bandaka na Yesu, mu ke kwenda tii na nsuka.
 Mu ke kwenda na Canaan. (Ya kieleka.)

¹⁰⁶ Moise. Muntu mosi tubaka ti Moise, na sika kuvwanda mwana ya Pharaon mpe kuvwanda na bima nionso ya yinza, yandi ndimaka kuvwanda mwana ya Abraham na sika kuvwanda mwana ya Pharaon. Mwana ya Abraham, muntu ya kiadi, na sika kuvwanda mwana ya Pharaon, ntinu mosi.

¹⁰⁷ Mu zola vwanda mwana ya Mfumu Yesu, mpe musadi na Yandi ya mbote, mpe kubaka sika ya munu na bantu yina me losama na yinza yayi, samu na kuvwanda Ntwadisi ya Etats-Unis ya Amerique yayi ya nene, to samu na kuvwanda Elvis Presley, to Pat Boone, to konso muntu yina. Mu ke baka nzila yina.

¹⁰⁸ Bantwenia ya bakento lunga baka nzila yina. Na sika kuvwanda Marie Pickford, to muntu mosi ya nene ya cinema, mwa kento ya kitoko, beno baka nzila na beno na mwa bantu ya kiadi ya Mfumu.

¹⁰⁹ Mu zola vwanda longi na zulu chaire, samu kulonga kimvwama yina ba ke bakulaka ve ya Klisto, na sika kuvwanda muntu ya cinema ya Hollywood, to muntu ya kulutilla nene na yinza. Kana mu ke dia bima ya fioti mingi, kulomba-lomba, to nionso yina mu ke sala, mu ke baka nzila na munu na mwa bantu ya Mfumu. Na lukwikilu, mu ke sala yawu. Bantangu ya mbote pesamaka na munu. Kasi, na lemvo ya Nzambi, mu ke tala kaka na lukwikilu.

Na lukwikilu mu lunga mona yawu ntama kuna;
 Mpe Tata na beto ke vingila munu na nsuka ya nzila,
 Samu na kuyidikila beto bayinzo Kuna.

¹¹⁰ Mufutisi-mpaku yina tubaka, kilumbu yina, “Samu na nki nge pesaka yinzo na nge na dibuundu yina? Yinki salaka ti nge pesa yinzo ya bamafunda makumi zole na tanu ya ba dollars na mwa tabernacle yina kubeba?”

¹¹¹ Mu tubaka, “Mu salaka yawu ve samu na yinzo-Nzambi. Ya ke samu na bantu yina ke kuna.” Mu ke na bima ya yinza yayi ve. Mwa mbongo nionso mu bakaka mu pesaka yawu na yinzo-Nzambi yayi. Samu na nki? Lukwikilu na munu ke na Nzambi, kasi na bima ya yinza yayi ve. Bansatu na munu nionso ke na

zulu. Mpe mu ke kwikila ti ya ke mutindu mosi samu na beno nionso, kana beno ke ya kusungama na Nzambi. Ya ke kieleka, beno ke mutindu yina. Beto, ke baka yawu, na lukwikilu. Beto, ke kwikila Nzambi, na lukwikilu.

112 Moise, yandi salaka kusoola mosi. Mpe yandi lendaka, na manima kusoola, yandi lendaka nwana samu na lukwikilu, mpamba ve, yandi titaka ve nganzi ya ntinu. Ntangu yayi, na kimuntu, yandi lendaka tita nganzi. Yandi lendaka tita nganzi ya ntinu, kasi yandi salaka yawu ve. Yandi salaka yawu ve, samu yandi vwandaka na kisalu ya kusala, mpe yandi vwandaka na sika ya yandi ya kisalu. Mpe yandi talaka ve yina ntinu lungaka tuba samu na yawu. Yandi bakaka kaka nzila na Yandi.

113 Ntangu yayi, Pharaon, ya kieleka, kubela na yandi monanaka, yandi zolaka pesa Moise mpe bana . . . Yandi tubaka, “Mbote mingi, mu ke na dibanza mosi. Beno nionso bikala na yinsi mpe beno kwenda kuna mpe pesa munkayilu na Nzambi na beno.”

114 Diabulu ke salaka mutindu yina. “Oh, nge lunga vwanda muntu ya bisambu. Samu na nki nge ke kwenda kuna ve mpe kuvukana na mwa dibuundu yina? Nge ke na nsatu ve ya kusala bima yayi nionso.” Bakala mosi tubaka na kento na yandi . . .

115 Kento tubaka, “Bakala na munu, mu me vulukaka. Manicure diaka ve, to rouge à levres mpe nionso yina. Nionso yayi diaka ve. Bankokila ya makinu diaka ve. Mambu ya kuzabana na kati ya bantu diaka ve. Mu me sukisa yawu! Mu ke baka ntangu na munu na kutanga Ndinga, mu ke vwanda na yinzo.”

116 “Ntangu yayi, tala, nkundi. Nge, nge lunga vwanda muntu ya bisambu, yina ke mbote mingi. Ntangu yayi, tala, nge—nge basika *awa*. Nge ke kwendaka na dibuundu ya yimbi.”

117 Ve, ya ke kieleka ve. Nge ke na dibuundu ya mbote. Kana beno ke na longi yina ke longa na beno mambu yina, beno kangama kaka na yawu. Tala na Masonuku mpe mona kana yina ke kieleka.

118 “Oh,” yandi tubaka, “kwenda *awa*. Bawu lenda—bawu lenda sala nionso yayi awa ve. Beno me mona? Bawu ke salaka mambu yayi awa ve.” Mutindu yina . . . “Kwenda kuna kasi ntama mingi ve.” Kasi yandi zola ve ti beno basika na yinsi. Yina ke mutindu diabulu ke salaka. Yandi zola ve ti beno basika na mambu ya yinza; yandi zola kotisa yinza na kati ya dibuundu.

119 Kilumbu mosi, mu vwanda tambula na bala-bala, mu zibulaka radio na munu. Mpe vwandaka na mukunga mosi, mpe mu vwanda widikila yawu, mpe mu lendaka widikila kaka, mukunga ya muvimba, na yawu, mu lunga tuba kana yawu vwandaka mukunga ya Nzambi, to kana yawu vwandaka diabulu yina vwandaka meka na kunata bima ya Nzambi na kisika ya yinza. Beno lunga sala mutindu yina ve! Nzambi kuwa mawa!

¹²⁰ Mu ke tala ve ba album yikwa Elvis Presley sonikaka, bamikunga nionso ya kitoko ya Nzambi. Yandi me twadisama na diabulu. Yandi me fidisa bana mingi na difelo, kulutila ba film nionso mu zaba, na yinza ya muvimba bubu yayi. Pat Boone mpe bayankaka, yandi ke mosi ya dibuundu ya Klisto; mpe Elvis Presley, Pentecotiste; ya ke Judas Iscariot, na mutindu ya bantu yina. Diabulu zola baka bima ya zulu ya Nzambi, na mutindu ti bawu lunga vukisa yawu *awa*. Bantu ke tala na zulu ya mambu *yayi* ve. Bawu ke tala kaka *awa*, ke tuba, “Mbote, nionso ke mutindu mosi.” Nionso ke mutindu mosi ve. Beno basika na yinsi.

¹²¹ Yandi tubaka, “Beno lunga kwenda kaka samu na bilumbu fioti. Mpe beno kwenda, kasi beno bikala na yinsi.” Ya kieleka, yandi zabaka ti bawu ke vutuka diaka. Na yawu yandi monaka ti yina lunga salama ve, na yawu yandi banzaka kima yankaka. Yandi tubaka, “Mu ke pesa na beno dibanza mosi. Beno kwenda bisika nionso beno me zola, kasi beno bika bakento na beno nionso, bana na beno nionso, mpe bangombe na beno nionso, *awa*. Beno bika yawu *awa*, mpe beno kwenda.” Samu, yandi zabaka ti bawu vwandaka na bima kuna, yina lungaka ndimisa bawu na kuvutuka diaka.

¹²² Mpe diabulu ke tubaka na beno mutindu yina. Ntangu nionso beno ke bika mwa bima ya yinza kukangama na beno, ti beno zola kaka kunwa makaya, beno zola kaka kunwa malafu, beno zola kaka kulwata mutindu yinza, yawu ke vwanda diambu ya diabulu.

¹²³ Mu ke waka mambu mingi samu na yina me tadila ba retrograde. Mu ke kwikila ve ti kele na ba retrograde mingi mutindu bantu ke banzaka yawu. Bawu ke bika bima mingi kuna na Egypte yina ke benda bawu kuna, yawu yina. Kuvwanda retrograde kele ve yina bantu ke tuba. Bima me bika bima mingi ya yinza na manima na beno, yawu yina ke benda beno.

¹²⁴ Mpangi-bakala, mu ke tuba na beno ti, na ntangu Israel yilamaka, na kati-kati ya mpimpa, bawu yidikaka bima nionso bawu vwandaka na yawu na yinza yayi, nionso vwandaka ya kuyilama samu na nzietelo.

¹²⁵ Bika ti Nzambi kutinda beto reveil ya mutindu yina. Beto yidika bima nionso kisika mosi, mpe beto finama na kukwenda. Kuboka mosi ke kwisa na kati-kati ya mpimpa, “Beno kwenda kutana na Yandi.” Kulutila mbote beno yidika bima ya beno nionso. Kulutila mbote beno vwanda na kima mosi ve, na yinza yayi, yina ke benda beno na kuvutuka, kima mosi ve kukanga beno. Beno yidika basanduku na beno. Beto yilama. Beto ke kwenda.

¹²⁶ Mpe beno zaba? Mu ke tuba na beno, bawu vwandaka ya kwikama na Nzambi, tii kuna Pharaon sukaka ntima na kati-kati ya mpimpa, yandi tubaka, “Beno kwenda! Beno kwenda,

mpe beno kwenda. Beno baka bima na beno nionso, mpe beno kwenda!”

127 Mu ke na kiese mingi na kumona muntu yina ke zinga pene-pene ya Nzambi, tii kuna diabulu ke mona diaka ve yinki kusala na yandi. Ya kieleka. Beno basika! Beno kwenda! Beno lemvuka na Nzambi!

128 Na lukwikilu, yandi monaka nsilulu. Muntu ya bisalu ya poto-poto, to muntu ya bisalu ya poto-poto ve, yandi kwendaka na mwa bantu ya kiadi ya Mfumu. Pharaon tubaka, “Beno baka bima na beno nionso mpe beno basika awa! Mu ke mona diaka ve yinki kusala na beno.” Yandi vwandaka ya kwikama na Nzambi, na lukwikilu.

129 Lukwikilu ke sala bimangu, kana beno vwanda ya kwikama na Nzambi. Na lukwikilu, beto ke mona Yandi.

Ntangu na beto me luta; beto me lutisa ntangu.

130 Kasi, na lukwikilu, na suka yayi, beno telemisa meso na beno. Beno tala ve yina ke pene-pene na beno, yinza ya bilumbu yayi, kasi beno tala mpe beno mona Yandi Yina pesaka nsilulu. Biblia tubaka, “Beto ke mona bima nionso mbote-mbote ve ntangu yayi, kasi beto ke mona Yesu.” Beno tala Yandi, na suka yayi, mpe banzila na beno ke soba.

131 Na mutindu beto ke kulumusa bayintu na beto, na mwa ntangu fioti, samu na bisambu. Bika ti Mfumu kuyika masakumu na Yandi na Nsangu.

132 Beno banza na kati ya bantima ya beno ntangu yayi. Beno talaka na bima ya yinza? Na lukwikilu, beno ke mona Yesu? Beno ke tala na kuzabana na beno, na dibuundu na beno? Na kisika na beno na kati ya bantu na yinza? To, beno ke mona Yesu Yina, na kukabula mpasi, me vwanda Yandi mosi na diboko ya kibakala ya Munene kuna na Zulu, Yina monaka mpasi mutindu mbangi mosi, muntu ya kieleka samu na muntu ya luvunu? Beno lunga telemisa ve meso na beno na zulu mpe kumona Yinti yina ya Luzingu kuna na zulu? Na yawu, bika yinti yayi ya mayele ya bantu mpe ya mazaya, mpe sadila Yandi.

133 Na ntwala mu sambila beno zola ti beto bambuka beno na bisambu? Beno telemisa maboko ya beno, samu na konso nsatu yina beno lunga vwanda na yawu. Nzambi sakumuna beno. Yandi ke mona maboko na beno nionso.

134 Kana nge ke nsumuki, telemisa meso na nge mpe tala ntangu yayi. Kana nge ke muntu yina ke kipaka diambu ve, kana beno ke na mwa kuswana mpe mwa mambu yankaka, yinki luswaswanu yawu ke sala? Beno ke fwa na mosi ya bilumbu yayi. Yinki kilumbu? Mbala yankaka bubu yayi! Beno zaba ve. Mbala yankaka na ngunga mosi, beno lunga kwenda na difelo, to mbala yankaka beno lunga kwenda na Zulu. Kasi beno lenda soola kaka

na ntangu yayi. Kana ke na kima mosi na luzingu ya beno yina ke mbote ve, beno soola ntangu yayi, na lukwikilu.

¹³⁵ Beno ke tuba, “Mbote, kana mu lunga vutula mbela na kento yina! Kana mu lunga vutula mbela na bakala yina!” Kutala ve yina bawu salaka, beno soola Luzingu. Beno soola Luzingu.

¹³⁶ Samu, Yesu tubaka, “Kana beno lolula ve na kati ya bantima ya beno konso muntu mambi ya bawu, Tata na beno ya Mazulu ke lolula beno mpe ve.” Na yawu beno kuma kuna. Kana ke na diambu mosi na kati ya ntima na beno ke telemina muntu mosi, nsumuki to santu, beno ke na kigonsa ya tiya ya difelo.

¹³⁷ Ntangu yayi beno telemisa meso na beno na zulu. Yinki beno ke mona, mbeni na beno? To, beno ke mona Mvulusi na beno? Yinki beno ke tala na suka yayi?

¹³⁸ Kana nge ke mbevo, mpe munganga ke tuba ti nge ke beluka ve, telemisa meso na nge, na kulunsi, sika wapi Yandi lwalaka samu na masumu na beto, na bamputa ya Yandi beto me vuluka. Beno tala ve na yina munganga ke tuba; yandi ke sadila mayele ya bantu. Lukwikilu ke salaka na nzila ya Mpeve mpe ya Nzambi. Beto banza bima yayi ntangu yayi mutindu beto me telemisa maboko na beto. Nzambi me mona yawu.

Beto sambila.

¹³⁹ O Nzambi ya Kukonda nsuka, na kati ya pima ya bisambu na ntangu yayi, na manima ya kulonga Nsangu, kupesa muswa ve ti bambuma yina ya Ndinga na Nge, Mfumu, kubwa na ntoto ya matadi. Kupesa muswa ve Mfumu, ti Nsangu, kubwa na kati ya bansende, na bayinti ya bansende, ti ba souci ya luzingu yayi (mutindu Lot) kufina yawu, na nsuka, beto losama. Kasi, O Nzambi ya lusakumunu, bika yawu kubwa na ntoto ya mbote, yina ke buta mbuma, na bantima ya kusungama. Mpe na ntima ya munu, diaka, Mfumu, ti beto tala na maneti ya Nzambi, mpe beto mona Dibuundu ya Mfumu Yesu yina me losama, bantu yina me losama, nzila yina me losama, mpe bika ti beto tambula na nzila yayi ya nkembo.

¹⁴⁰ Mutindu mosi Moise, yina zabaka ve sika yandi vwandaka kwenda. Bantu zabaka ve sika bawu vwandaka kwenda. Bawu zabaka ve yinki lweka kukwenda. Bawu kwendaka kaka.

¹⁴¹ Mpe, O Mfumu Nzambi, mutindu mukunga yayi ya kitoko mingi ke bula, na lukwikilu beto ke mona Ntoto yina na ntama. Ti na ntangu yayi, babakala mpe bakento yayi awa ke banza diaka ve na yina yinza ke tuba, to wapi mutindu bawu ke kwenda. Bika bawu telema na mpeve na bawu, mpe kwenda.

¹⁴² Moise landaka Nsemo, mpe Yawu twadisaka yandi tii na yinsi ya nsilulu. Yandi zabaka ve sika yandi vwandaka kwenda, kasi yandi tambulaka kaka na kati ya Nsemo, tii na yinsi yina ya kitoko mingi kulutula kilumbu.

¹⁴³ Mfumu, sala ti, bubu yayi, bantu mingi awa kutambula na kati ya Nsemo ya Masonuku mpe na ngwisani na Mpeve-Santu, mpe na Dibuundu; Dibuundu, ya Bankulutu, bana ya fioti yayi me ndima Klisto, mpe me fuluka na Mpeve-Santu, yina ke twadisama na Mpeve. Bika beto tambula na ngwisani yayi, kintwadi, pene-pene ya misiku ya Nzambi, kusadila Yandi na mbotika, na kutumama na lufwa ya Yandi, kuzikama, mpe mvumbukulu. Bika beto sadila Yandi na misiku na Yandi, “Beno bikala na Jerusalem tii kuna beno ke fuluka na Ngolo ya Zulu.” Bika beto sadila Yandi na kubeluka ya Bunzambi, na kusambila samu na bambevo. Bika beto sadila Yandi na mbundana, na kuzenga dimpa, na ntima ya kukikulumusa, na ngwisani na Ndinga ya Nzambi. Bika beto sadila Yandi na misiku na Yandi nionso ya Bunzambi, tii kuna Yinsi ke monika. Pesa yawu, Mfumu. Wa bisambu na beto, mutindu beto ke pesa nionso na Nge na ntangu yayi, na Nkumbu ya Mfumu Yesu.

¹⁴⁴ Ntangu yayi na bayintu na beto ya kukulumusa, na pima nionso, na malembe nionso, beto yimbila mukunga yayi. Yayi ke ntangu ya kusambila. Nsangu me mana. Muntu mosi ve kukwenda. Beno vwanda kaka pima. Beto sambila.

¹⁴⁵ Nsangu ke sungikaka. Beno banza ntangu yayi na yina beno salaka, na yina beno lendaka sala, yina salaka beno yina beno kele bubu yayi. Yina ke bedisa beno, bubu yayi, yawu yina salaka beno kima mosi mazono. Yinki ke vwanda mbasi? Beno sungika yawu bubu yayi, mpe mbasi beno ke vwanda na kimpwanza. Beno me mona? Beno soola kaka. Wapi mutindu beno lunga sala yawu? “Na lukwikilu, mu ke yambula yawu ntangu yayi. Mu ke yambula yawu, mpe kilumbu mosi mu ke kwenda Kuna.”

Na kiese ntama ve,
Beto ke kutana na yinsi ya kito- . . .

Ntangu yayi beno sambila kaka Mfumu na mpeve na beno.

Na kiese ntama ve,
Beto ke kutana na Dibuundu yina ya kiadi.
(Nzietelo ya mpasi, kasi beto ke kutana
kilumbu mosi.)

Na Tata ya beto ya lutondo kuna na zulu,
Beto ke pesa makabu mpe lukumu,
Samu na dikabu ya nkembo ya zola na Yandi,
Mpe mambote yina ke yangidisa ba . . .

Na mwa bantu ya kiadi ya Mfumu, na lukwikilu, mu ke soola.

Na kiese (na kiese) ntama . . . (ntama ve)
Beto ke kutana na yinsi yina ya kitoko mimgi;
(ntama ve)
Na kiese (na kiese) ntama ve,
Beto ke kutana na yinsi yina ya kitoko mingi.

Kele na Yinsi mosi ya kitoko . . .

Beto sambila Yandi. Yai ke ntangu ya kusambila.

. . . lukwikilu mu lunga mona,

Na lukwikilu mu ke soola.

Oh, Tata ke vingila . . .

¹⁴⁶ Mu ke mona bantu nionso ya Mfumu Kuna; Mpangi George, Mpangi Seward, basantu nionso.

. . . kuyidikila beto kisika mosi Kuna. (Yinga, Mfumu!)

Na kiese . . .

¹⁴⁷ Tata na yandi, Howard, Edward, bankundi yayi nionso ya busantu yina me baka Nzila, kuna, tuka ntama.

Na kiese (Yinga, Mfumu!) ntama ve (ntama ve),
Beto ke kutana na yinsi yina ya kitoko mingi.

Beto ke yimbila na yinsi yina ya kito- . . . (O Nzambi!)

Mikunga ya kitoko ya lusakumunu, (Nkembo na Nzambi!)

. . . ke vwanda diaka ve na mawa,

Ke vwanda diaka ve na mpasi kasi
masakumunu na Kisika yina ya kupema.

Na kiese, na kiese ntama . . . (ntama ve)

Beto ke kutana na yinsi yina ya kito- . . .



NA LUKWIKILU, MOISE KNG58-0720M

(By Faith, Moses)

Nsangu yayi ya Mpangi William Marrion Branham, kulongamaka na Kingelesi, na suka ya Lumingu na kilumbu ya 20 ya Ngonda ya Sambwadi, na mvula 1958, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org